

Ukioq naallugu sapaatip akunnikkaartumik Narsarsuup Keflavik-illu akornanni amigartooruteqarsinnaanermut qulakkeerutissalimmik 1. januar 2014-imiit timmisartooqartalernissaanik Naalakkersuisut pilersitsinissamik peqquneqarnissaannik Inatsisartut aalajangiiffigisassaattut siunnersuut

(Kim Kielsen, Siumut)

Akissuteqaat

(Peqqissutsimut Attaveqarnermullu Naalakkersuisoq)

Siullermeerneqarnera

Kim Kielsen aalajangiiffigisassatut siunnersuummut saqqummiusnaanut qutsavigaara.

Nuna tamakkerlugu angallassinikkut pissutsit pitsaanerulersinneqarnissaannik, innuttaasullu, namminersortullu takornariaqarnerullu periarfissarissaarnerulernissaannik Naalakkersuisut kissaateqarnerat siunnersuutikkut taperseerqarpoq. Naalakkersuisut Kujataani angallannikkut pissutsinik pitsaanerulersitsiniarnerat Naalakkersuisut Siulittaasuata Inatsisartut ukiaq manna katersuunneranni ammaalluni oqalugiarnertigut erseqqissumik takutinneqarpoq, tassani Qaqortumi mittarfiliornissaq pingaarnertut taaneqarmat.

Naalakkersuisut timmisartuussinerup tunngassuteqartuni immikkoortunut pilersaarusiorniarput, tassungalu atatillugu naliliissallutik nunatsinniit nunatsinnullu ingerlaarfiit taperseerqarnissaat qanoq pissusissamisoortigissanersoq.

Tapiissutit ullumikkut angallassinermut atorneqartartut nunatsinniinnaq angallassinermut sammitinneqartarput. Assersuutigalugu Canadamut USA-mulluunniit ingerlaarfiit tapiiffiqineqarnej ajorput, Naalakkersuisullu tunngaviatigut akerleraat nunanut allanut ingerlaarfiit amigartooruteqarsinnaanermut qulakkeerinneqartalernissaat.

Naalakkersuisut miserratinginngilaat Kujataani innuttaasut angalaniarnerat ajornakusoornulerlunilu akisunerulersimasoq, tassami ukiup ilarujussuani Narsarsuarmut Kangerlussuarmullu aqqusaaqqaarluni angalasoqartariaqartarmat. Assersuutitulli taaneqarsinnaavoq Qaanaami innuttaasut Upernavik, Ilulissat Kangerlussuarlu aqqusaaqqaartariaqartarmassuk, soorlu aamma Ittoqqortoormiini innuttaasut angalaniaraangamik Nerlerit Inaat Kangerlussuarlu aqqusaaqqaartariaqartaraat.

Naalakkersuisut Kujataani angallassinerep ilusaata pitsaanerulersinneqarnissaanik kissaateqarneq isumaqatigaat, innuttaasunullu ataasiakkaanut pisariitsumik akikitsumillu angallassinerep aqqiivigineqarnissaanik pisariaqartitsineq paasilluarsinnaallugu. Taamaakkaluartoq

Naalakkersuisut isumaqarput taamatut amigartooruteqarsinnaanermut qulanaveeqqusiineq unammilleqatigiinnermik equtitsisinnaasoq, nunatsinni tamarmi timmisartuussinerup aaqis-suussaananut pitsaanngitsumik sunniuteqartumik. Taamatuttaaq siunnersuutip piviusunngortinneqarnissaanut aningaasaliissutissanik innersuussisoqartussaassaaq.

Naalakkersuisut siunnersuut siunissami timmisartuussinerup ilusiligaanissaanut annertuumik soqutiginninnertut isigaat, pitsaasumillu oqallittoqartuaannarnissaa qilanaaralugu. Taamatuttaaq Naalakkersuisut isumaqarput siunnersuutikkut angallassisartut malugisinnaalissagaat Islandimut timmisartukkat attaveqartarnerit inuiaqatigiinnit kalaallinit soqutigineqartut.

Siuliini oqaatigineqartut tunngavigalugit Naalakkersuisut kaammattuutigissavaat siunnersuut itigartitsissutigineqassasoq.